



ЫНТЫМАҚТАСТЫҚ
НЫҒАЯ БЕРМЕК



Мемлекет басшысы Қасым-Жомарт Тоқаев Ресей Президенті Владимир Путинмен телефон арқылы сөйлесті.

Өңгімелесу барысында тараптар Қазақстан-Ресей ынтымақтастығының қазіргі жай-күйі мен перспективаларын талқылады.

Президенттер сауда-экономика және энергетика салаларында бұған дейін жоғары деңгейде қол жеткізілген уағдаластықтарды толықтай жүзеге асыру қажет екенін атап өтті.

Сондай-ақ Владимир Путиннің Астанаға жоспарланған мемлекеттік сапарына дайындықтың сапалы болуын қамтамасыз етуге келісті.

Мемлекеттер басшылары халықаралық күн тәртібіндегі өзекті мәселелер жөнінде пікір алмасты. Қасым-Жомарт Тоқаев Қазан қаласында өтетін БРИКС саммитіне қатысуға шақырғаны үшін Ресей Президентіне ризашылығын білдірді.

ҚЫС ШАНАҒДЫ ЖАЗ САЙЛА

ЖЫЛЫТУ МАУСЫМЫНА ДАЙЫНДЫҚ ҚАНДАЙ?



Қазақстан күзгі-қысқы жылыту маусымына дайындалып жатыр. Алайда кейбір өңірдің даярлығы төмен деңгейде екені белгілі болды. Біраз қазандықта жөндеу жұмыстары, тіпті басталмаған! Өзгесінде жаңғырту жұмыстары 60-70% ғана орындалды. Энергетикалық кәсіпорындардың миллиардтаған қарызы да өткен маусымнан «мұраға» қалып, сол бойы өтелмейті. Проблемаларды шешу бағытында не істеліп жатыр?

(Жалғасы 5-бетте)

БИЫЛ ҚЫРКҮЙЕКТЕ
МЕКТЕПКЕ
БАРАТЫН
ОҚУШЫЛАР САНЫ
3,9 МИЛЛИОНҒА
ЖЕТТІ. ОНЫҢ 360
МЫҢҒА ЖУЫҒЫ
МЕКТЕП
ТАБАЛДЫРЫҒЫН
АЛҒАШ АТТАҒАЛЫ
ОТЫР. БІЛІМ
КҮНІНДЕ
РЕСПУБЛИКА
КӨЛЕМІНДЕ 61
ЖАҢА МЕКТЕП
ПАЙДАЛАНУҒА
БЕРУ
ЖОСПАРЛАНҒАН.
ЖАЛПЫ, 2024
ЖЫЛЫ ЕЛІМІЗДЕ
536 МЫҢ ОҚУШЫҒА
АРНАЛҒАН 302
ЖАҢА МЕКТЕП
ЕСІГІН АЙҚАРА
АШУЫ ТИІС.



«ЖАЙЛЫ МЕКТЕП» – ЖАҢА МҮМКІНДІК

«Орта білімнің сапасы – табысты ұлт болудың тағы бір маңызды шарты. Әрбір оқушының білім алып, жан-жақты дамуы үшін қолайлы жағдай жасалуға тиіс. Сол үшін «Жайлы мектеп» ұлттық жобасы қолға алынды. Біз 2025 жылға дейін 800 мың баланың заманауи мектепте оқуына жағдай жасаймыз. Осылайша, апатты жағдайдағы және үш ауысыммен оқитын мектеп мәселесін толық шешеміз. Бұл ауыл және қала мектептерінің айырмашылығын едәуір азайтады. Жалпы, мектеп салу Үкімет және әкімдіктер үшін басты міндеттің бірі болуы керек», – деп Мемлекет басшысы

Қасым-Жомарт Тоқаев халыққа Жолдауында (2022 жылы) атап айтқан болатын.

Жоба аясында 2023-2025 жылдары еліміз бойынша 401 мектеп салу жоспарланып, бұл мақсатта республикалық бюджеттен 2,6 триллион тенге бөлу қарастырылды. Сонымен қатар жоспар бойынша жаңа мектептер ең заманауи құрал-жабдықтармен, қажетті оқу кабинеттерімен, спорт залдарымен жабдықталуы тиіс. Бастауыш және орта сыныптарды жеке асханалары, жуынатын бөлмелері, спорт залдары бар бөлек блоктарда оқыту ұсынылған-тын.

6
БЕТ

Айгүл ҚҰСПАН,
Парламент Мәжілісі Халықаралық
істер, қорғаныс және қауіпсіздік
комитетінің Төрайымы:



«АРМИЯ – ТӘУЕЛСІЗДІК ТІРЕГІ»

Қауіпсіздікті сақтау мен елдің қорғаныс қабілетін арттыру Қазақстан үшін бірінші кезектегі мәселелердің қатарында тұратыны сөзсіз. Президент Қасым-Жомарт Тоқаев та жыл сайынғы Жолдауларында бұл мәселеге тоқталмай өткен емес. Былтыр қорғаныс-өнеркәсіп кешені мәселесіне назар аударған. Ал Парламент Мәжілісі өткен сессиясында қорғанысқа қатысты бірқатар мәселе көтерді. Біз Мәжілістің Халықаралық істер, қорғаныс және қауіпсіздік комитетінің Төрайымы, «AMANAT» партиясы фракциясының мүшесі Айгүл Құспанмен сұхбаттасып, қауіпсіздікке қатысты бірқатар сұрақ қойған едік.

– Мемлекет басшысы былтыр «Әділетті Қазақстанның экономикалық бағдары» атты Жолдауында қорғаныс-өнеркәсіп кешенін нығайтуды тапсырған еді. Аталған тапсырманың құқықтық базасы қалай жасақталып жатыр?

– Бұл еліміздің қорғаныс қабілеттілігі үшін өте маңызды. Шынында да, Президент Қасым-Жомарт Тоқаев былтырғы Жолдауында қорғаныс-өнеркәсіп кешендерін жан-жақты нығайтудың маңызын ерекше атап өтті. Президент дамыған мемлекеттерде қорғаныс өндірісі ұлттық қауіпсіздікті қамтамасыз етуде шешуші рөл атқаратынына баса маңыз бөлді. Осы орайда Мемлекет басшысы қорғаныс өнеркәсібін дамыту мәселелерін үнемі назарында ұстайтынын айта кеткеніміз жөн. Мәселен, 2023 жылғы наурызда «Қазақстан Парламентінің инженеринг» зауытында болып, мемлекеттік қорғаныс тапсырысын жоспарлау мерзімін 3 жылдан 5 жылға дейін қайта қарауды тапсырған болатын. Депутаттық корпус та бұл мәселені назардан тыс қалдырып отырған жоқ. Біздің Халықаралық істер, қорғаныс және қауіпсіздік комитеті мемлекеттік қорғаныс тапсырысы және қорғаныс өндірісін дамыту мәселелері бойынша дөңгелек үстел, тақырыптық отырыстар өткізеді.

Бұдан бөлек, 2023 жылғы 16 қазанда Президент қол қойған «Қазақстан Республикасының кейбір заңнамалық актілеріне мемлекеттік наградалар, мемлекеттік авиация, қорғаныс өнеркәсібі және мемлекеттік қорғаныс тапсырысы мәселелері бойынша өзгерістер мен толықтырулар енгізу туралы» заңның жобасына бастамашылық жасадым. Президенттің сіз айтқан тапсырмасын біз қорғаныс өнеркәсібін өндіруге шарт жасасу тетігі арқылы заң жүзінде рәсімдедік.

Бұрын мұндай келісім тек 3 жылға жасалуы мүмкін еді.

Мысалы, Орал қаласындағы «Зенит» зауыты 1993 жылдан бастап әскери кеме жасаумен айналысады, бұл – технологиялық тұрғыдан ұзақ өндіріс. Зауыт технологиялық мерзімі 4 жыл болатын көпфункционалды кеме жасайды. Ал заңнама тек 3 жылға шарт жасасу мүмкіндігін қарастырды. Енді біз қорғаныс-өнеркәсіп кешенінің кәсіпорындарына ұзақ мерзімге шарттар жасасуға мүмкіндік беретін түзету енгіздік. Бұл, мысалы өнімді дайындаудың технологиялық мерзіміне сүйене отырып, шарттық мерзімін анықтауға, бірнеше жыл ішінде қару-жарақ пен әскери техниканың үлкен партиясына шарт жасасуға, сынақтар жүргізу мерзімдерін және қару-жарақ пен әскери техниканы алушыларға тапсыруды ескеруге кең мүмкіндіктер ашады. Бұл түзету бюджетке түсетін жүктемені азайтуға мүмкіндік береді, ал қорғаныс-өнеркәсіп кешендері кәсіпорындары өз өндірісін ұзақ мерзімге жоспарлай алады.

(Жалғасы 4-бетте)

• БҮГІНГІ НӨМІРДЕ:



САРҒАЙМАҒАН
АСТЫҚТА
САПА
БОЛА МА?

3



ЕСКІ ҮЙДІҢ
СӘУЛЕСІ
МЕН ӘУРЕСІ

6

